

Dinfwngz Caixhangz Gou

我 擅 长 的 手 艺

贵港市覃塘区蒙公乡高占小学六(1)班 Lij Hungzswnh/李宏绅

Vahsug gangj: Sam bak roekcib hangz, hangzhangz ok cangyenz. Raeuz moix boux vunz cungj miz dinfwngz swheij, lumj diuqfoux、ciengqgo、vehveh、raedcej、daj-cawj…… Dinfwngz caixhangz gou dwg senj makgam.

Mwngz itdingh gig geizheih vih gijmaz dinfwngz caixhangz gou dwg senj makgam? Youh dwg baenzlawz lienh baenz? Gizaed mbouj muenz mwngz gangj, gou couhdwg vihliux daxbuz gou cij lienh baenz dinfwngz caixhangz genj makgam. Aenvih daxbuz gou gwn mbouj ndaej soemj, moix baez daxmeh cawx makgam maranz, makgam soemj lai, daxbuz cungj mbouj gamj gwn, gou raen daengz yienghneix, gig sim'in daxbuz. Ndigah gou couh siengj baenzlawz senj makgam cij van ne? Gou hainduj yenzgiu, gou hwnj muengx bae caz swliu mizgven gonq, caiq giethab bingzseiz cazyawj, ndaej-daengz yienghcej makgam van caeuq makgam soemj mboujdoengz, seizgan nanz le, gou couh rox baenzlawz senj makgam van lo.

Gou dauqdaej miz gihvei daeuj

cingqsaed dinfwngz caixhangz senj makgam gou lo. Ngoenzhaenx ngoenz-singhiz, gou caeuq daxmeh bae haw, vunz gwnz haw baebae dauqdaej, gou riengz daxmeh byaij haeuj ndaw haw bae, ndaw haw doxgaiq lai raixcaix, yawj ndaej gou dava liux. Gou yawjraen baihnaj miz dan gai mak, gou angqvauvau, sikhaek rag fwngz daxmeh byaij gvaqbae. Daeujdaengz dan gai makgam, daxmeh maeuq roengzdaeuj yaek senj makgam, gou doiq daxmeh naeuz: "Daxmeh, hawj gou daeuj senj, gou rox senj bw." Daxmeh riu dwk naeuz: "Ndei, ndei, ndei, hawj mwngz senj, hawj mwngz senj." Gou senj aeu aen makgam cungdaengj, naeng raeuz mbouj miz diemjraiz, mbouj geng hix mbouj naemz, hangxmak luenzlulu, gou saenqsim cib cuk doiq daxmeh naeuz: "Daxmeh, aen neix dwg aen van." Daxmeh riunyumj doiq gou naeuz: "Daeglwg ha, mwngz nyinhnaeuz van couh cuengq roengz ndaw daeh bae ba." Dingq daxmeh baenzneix gangj, gou engq miz saenqsim lo. Gou gaemdawz aen makgam naeng ndongqlik genggwk ndeu hwnjdaej,

yawjraen aen makgam hangxmak mbouj luenz, couh cuengq roengz-daeuj, lauxbanj yawjraen le ngeizvaeg cam gou naeuz: "Siujbaengzyoux, aen makgam neix gyaundeix raixcaix, mwngz vih gijmaz mbouj aeu ha?" Gou riu dwk doiq lauxbanj naeuz: "Lauxbanj, mwngz mbouj rox, mwngz mbouj rox, mwngz aeu daeuj gwn couh rox lo." Lauxbanj dingqni gou yienghneix gangj, couh mbiq aen makgam neix daeuj gwn, cij raen de naj mbwngmbwt, bwnda nyouq doiq gou naeuz: "Siujbaengzyoux, mwngz baenzlawz rox aen makgam neix soemj?" Gou itit ngeihngeih daeikiq dwk lwnh lauxbanj goj senj makgam gou. Lauxbanj dingq le yaengx lwg-fwngzmeh doiq gou naeuz: "Siuj-baengzyoux, mwngz caen ak, gou boiqfug mwngz!" Gou daeikiq dwk doiq lauxbanj naeuz: "Docih mwngz haenh gou." Gou senj ndaej daeh rim le cij hawj lauxbanj caengh. Daxmeh hawj ngaenz le, gou caeuq daxmeh couh angqvau maranz lo.

Ma daengz ranz, gou heuh daengx ranz vunz daeuj gwn makgam, gyoengqde cungj haenh naeuz: "Mak-



gam van raixcaix, caen ndeigwn." Daxbuz itmienh gwn itmienh lumh gyauej gou naeuz: "Lan ha, mwngz caen coengmingz, mwngz senj daeh makgam neix caen van, gou gwn ndaej gig feihdauh." Dingq daxbuz yiengh-neix gangj, ndawsim gou gig angq, youh daeikiq fwngfwng lwnh baenz-lawz senj makgam van hawj daihgaya nyi.

Neix couh dwg dinfwngz caixhangz gou——senj makgam.

(boux lauxsae son'gyauq Cinz Hungmeiz)

Duzyiengzbaengz Ndeigyaez

可爱的小布羊

Daxgux gou cawx duz yiengz-baengz guhcaemz ndeu hawj gou. Gou maij duz yiengzbaengz neix raixcaix lo!

Duzyiengzbaengz mbouj hung, daihgaiq miz song fajfwngz gou baenzneix raez. Aennaj de hoengz-maeq, byoemgyaeuj henjnamh, bwn yungzyubub, ndeiawj raixcaix. Duzyiengzbaengz miz doiq lwgda ronghsaksak ndeu, gig cingsaenz. Aenndaeng de ndeiriu dangqmaz, couh lumj cih Sawgun “八” dauq-dingq nei. Aenbak de loh ok diuz linx iq saekmaeq vadauz ndeu. Baihlaj byoemgyaeuj maj miz song aen rwz raezrangrang, rog rwz dwg saek hoengzmaeq, ndaw rwz dwg saek henjmakgam, lumj song limq va raez hai hoenghhwdhwd. Ndag de hix dwg saek henjmakgam, baihsuwx lij miz aen “sim” hung ndeu, baihdaw sij cih saw Yinghiy. Sei q diuz ga de lumj sei q diuz saeu luenzlulu nei, gaiqdin lumj buenq aen luenz nei dwg saek henjgeq, ndeiawj raixcaix. Yungh fwngz bae lumh diuzrieng henjoiq de, unqnumnum、raeuz-

rwdrwd, mizyinx dangqmaz.

Duz yiengzbaengz neix bineix ndaej song bi lo, de vanzlij ndeigyaez baenzneix, gou ngoenznaengz cungj got de ninz.

(bouxij: Sanhdungh Swngj Ci-ningz Si Couhcwngz Si Daihngaih Szyen Siujyoz Yaugih Baihnanz ngeih nienzgaep ban 1 Cinz Cinh-goh boughoiz: Veiz Yinyiz)



gojgaeq lwgnyez lienzdaeng

Goyizcienz

榆钱树

4

Daxbuz cingq youq henz saeuq nyaengq dwk, yawjraen Siujvwnz daj ndaw rug byaij okdaeuj.

"Daxbuz, bae hag yaek daengzceiz lo, mwngz baenzlawz mbouj heuh gou hwnqdaeuj ne!" Siujvwnz dawz aen daehsaw venj gwnz ciengz haenx roengzdaeuj, aeu sujbaq rubrab uet naj mbat ndeu, couh yaek bae hag.

"Gwn caeux le caiq bae hag ba, ceiz di ndeu mbouj yougaenj law." Daxbuz ganjgip daek vanj haeux ndeu hawj Siujvwnz.

"Mbouj ndaej daengzceiz bw, daxbuz, mwngz geiq ndaej rwed raemx hawj goyizcienz bw, gou bae hag lo." Siujvwnz aemq aen

daehsaw, buet ok ranz bae.

Siujvwnz daj hagdangz dauqma, lumj bingzciengz nei, ma ranz gienh saeh daih'it, couh dwg yawj goyizcienz. De heux goyizcienz gien ndeu, lumhlumh ganjfaex, habhoz dwk haeuj ranz lo.

"Mwngz caen yawjraen go faex haenx ha?" Daxbuz ndenq boi raemx ndeu hawj Siujvwnz, laeglemx cam de.

"Yawj ndaej raen ha, goyizcienz hung youh ok nyod moq lo." Siujvwnz naeuz, youh yawjyawj goyizcienz ndawhongh, aennaj vuenheij raixcaix.

Daxbuz yawj dwk Siujvwnz, sim geuj baenz ndaek ndeu.

(Gyah Yingj) (5)

(dozcap banjneix daj gwnzmuengx aeu)